



KRISTIAN THALAI

May
2014



Kristian Thalai Pâwl Chanchinbu thla tin chhuak

Vol V No. 3



4:11

Kristian Ṭhalai Pw̃l chanchinbu ṭhla tin chhuak

1970-a chhuah tan ■ Kum 44-naa wawi 4-na ■ Chhuah tawh zat : 428

Editor :

Pu Lalmuanpuia

Joint Editors :

Pu C. Laldingliana

Upa K. Rorelkima

Pu V. Lalrinmawia

Pu Vanlalpeka

Manager :

Tv. R. Lalramnghaka

A lak man :

Kum khatah - Rs. 60.00

Copy khat - Rs. 5.00

*Thu chhuah tûr nei chuan
Editor, Kristian Ṭhalai, Synod
Office-ah thawn tûr a ni a; a la
duh chuan KṬP Office-ah a man
pêk lâwk a ngai.*

Office Phone : 2326372/2335821

**E-mail : kristianthalai@yahoo.com
centralktp@gmail.com**

**Visit us :
cktp.blogspot.com
www.facebook.com/centralktp**

KRISTIAN ṬHALAI PW̃L

Thupui

Rawngbawl tûra chhandam

Thupui inngahna

Ephesi 2:10 Ṭhil ṭha ti atân Krista
Isuaah chuan siama awmin, ama
kutchhuak kan ni si a, chu ṭhil ṭha tih
chu kan awmna tûrin Pathianin a
buatsaih lâwk a ni.

Ṭhil tumte

1. Isua Krista rinna leh amah anna
kawnga ṭhalaite hruai.
2. Kohhran kut ke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

1. Editorial	1
2. Mahni inhmangaih dan dik	2
3. K.Ṭ.P	6
4. KṬP leh zirna	9
5. Heti zawk hian le!	13
6. Kosopcherra Kohhran Biak In kan sa	15
7. <i>Hringlang tlâng</i> – Hmangaihna dik	18
8. <i>Rimawi</i> – Zaipawl ṭha	19
9. <i>Hriatzauna</i> – WWJD	21
10. <i>Hriselna</i> – Amphetamine	24
11. <i>Kantu</i> – Ramthar Tlângveng branch	28
12. Keimahni	30



ṬHALAITE KHAWVEL

PATHIAN kaihhruainain kuminah Bial KṬP Conference te, KṬP General Conference leh Bial Inkhawmpui te kan hmang zo leh ta a, a lawmawm hle. Kan hriat ṭheuh angin kan Kohhran hi inkhawmpui leh Committee hmanga inkaihruai kan ni a. Inkhawmpui leh Committee thu ngaichang thiam tak Kohhran kan nih avangin vawiin thlengin ṭha takin kan kal thei a, a lawmawm tak meuh a ni.

Hetianga kan kal hi tun thleng chuan kan ṭhatpui tih loh rual a ni lo. Chutih rual chuan hun kal zelah mihring ziate pawh hi a lo danglam chak hle mai a. Kohhran din chhan leh a lungphum chu pangngai reng mah se hun a danglam ang zela ṭhangthar nun man phaka rawngbawlina her rem thiam a ṭha hle awm e.

Tih dan pangngai thlah phal lova vawm tlat hi Kohhran ṭhanmawhbawk a ni ve thei a. Chutih rual chuan tih dan thar apiang dik leh ṭha berah ngaia um zel tur tihna erawh a ni chuang lo va. Engkimah thlarau leh tih tak zeta kan tih loh chuan eng hmanrua pawh hmang ila Pathian kan ko ei thei lo vang. Tih tak zeta kan tih erawh chuan eng ang hmanrua pawh hmang ila hnai teah Pathian a awm a ni tih kan hre thei awm e.

Kohhran ṭiak tirah khan Juda Kristianten an sakhaw dan hlui ṭangkai lo thlauhthlak leh dan thar seng luh thuah harsatna an neih avangin Jerusalem khawmpui an ko va, chuta an rel ang chuan dan hlui ṭhenkhat hnawolin dan thar ṭhenkhat an seng lut a. Chu hmanraw thar hmanga Chanchin Ṭha an han hril meuh chuan mi tam tak Lalpa hnenah an seng lut a nih kha.

Kohhran inrelbawlnaah hian kum lama upa zawkte kan inchawimawina hi vawm zel tlaka ṭha a nih rualin ṭhangthar zingah mi ṭha tak tak dap chhuahna remchang siam te, mi an tha ṭhum hma, an rilru leh taksa viak ṭhat laia hman ṭangkaina remchang siam te hi kan tih zel tur niin a lang. Kan chen mekna khawvel hi ‘Ṭhalaite khawvel’ an tih angin ṭhalaite huam kim thei zawnga hma lak zel hi kan hmasawn zelna tur niin a lang♦

MAHNI INHMANGAIH DAN DIK

— Rev. Vanlalzuata, Chawlhmun

‘Ka nun eng mah lovah hian engkim ka lo hmu ta’ (Thuh. 7:15)

Mahni inhmangaih hi chu a nachang kan hre vek a, rannung takngialte pawh hian an hria a, tu mah hi zirtir kan ngai lo. Kan nausen lai aţangin mahni inhmangaihna hi kan nunah hian a bet tlat a, buai lohna tura kan buaina tam takte pawh hi mahni kan inhmangaih lutuk vang hi a ni. Chuvangin mahni kan inhmangaih dan tur hi zir a pawimawh a, mahni inhmangaih dan dik phei chu kan thiam a pawimawh lehzuai a ni. Chu chu khawi aţangin nge kan zir ang? Kan Bible aţanga zir chhuah a pawimawh a ni.

1. **A  obul :** Mahni inhmangaihna hi a upa tawh hle a, Eden huana lo piang chhuak tawh kha a ni a, thlemtu r l vanga lo awm a ni nghe nghe. Mahni inhmangaihna avangin Adama leh Evi kha Pathian lakah an hel a, an tlu ta a. Keini an thlah kal zelte pawh hian

mahni inhmangaihna hi kan rochung ta zel a nih hi. Bawhchhiatna avanga mahni inhmangaihna chuan itsikna te, mahni hmasialna te, chaponate hi fa chhawm atan a nei lo thei lo bawk. German ram lal Kaiser-a chuan amah ringawt a inngaihtuah a. Inneihna hmuna a kal chuan mipui mit f kna ber monu leh mopa nih a duh a, nausen baptisma-na hmuna a kal pawhin mipui mit f kna ber nausen kha nih a duh a, mitthi vuina hmuna a kal pawhin mite kal khawm chhan ber mitthi kha nih a duh tho a ni, an ti. Mahni inhmangaihtute chuan hmun laili ber chan an duh a, a sirah mi dang an dah a, an hah ru ngawih ngawih mai  thin a ni. An tlukpui ve tho nia an hriatten anmahni aia dinhmun  tha an luah phei chuan thiknain an khat tlat a, anmahni intar lang chungin chu mi chu demna tur an zawng chawp  thin a ni. Chu rilru chu r l rilru, Eden huana tuh, kan thilunga  to chhuak, kan nuna rah chhuak chu a ni.

2. **A hrehawmzia** : Mahni inhmangaih lutukna hi mahni thlan khur laih ngeia ipik taka rumna hmun a ni a, mahni thangkam ngeia âwk kan ni bawk. Mahni inhmangaihna chuan mi dangte itsikna leh huatna arawn hring ngei ngei a, chu chu mahni leh mahni inhremna a lo ni si a. Mi tu emaw chu kan hua a, kan itsik a, kan ngei a, amaherawhchu ani chuan kan hua tih pawh hre lovin hlim takin khawlai a leng hah hah mai si a, chutih lai chuan amah hawtu chu kan rit churh a, kan tûm bûr mai a. Chuti a nih chuan tu nge kan hrem? Kan huata kha kan hrem lo va, a hawtu keimah leh keimah ka inhrem a nih chu. Thinurna a lo chhuahna pawh hi he pûk chhia aţang bawh hian a ni. Fak phû viauva kan inhriat laia miten min sawisel hlauh si chuan min sawiseltu lakah khan kan thin a ur ta a, mahni bawk kan inhrem leh ta a ni.

Mahni inhmangaihna in a ken tel tlat- itsikna te, mahni hmasialna te, chaponate hi mahni inhremna mai a ni lo va, khawvel nun tihrehawmtu a ni a, Kohhrana kan rawngbawlhona ngeiah pawh hian thil hnawkbaw a tling hial ang. Kohhran hlapui phuahtu

John Newton-a pheichuan, “Mi chapote hi Kohhran hmelmama No. 1 an nie” a tih hial a ni. Itsikna hi chem lova mahni lu lakna a ni a, virvawm hlauhawm tak a ni bawka, mi itsik chingte reng reng hian keimahni leh keimahni kan invawm tih kan hre phal si lo. Hamanan Mordekaia a itsik avangin lal hnenah a hêk a, lal chuan Mordekaia awhhlumna tur a siamtir ta a, nimahsela a tawpah chuan ama siam ngeiah Hamana chu a inawkhlum ta hlauh zawka a nih kha (Esth. 7:10). Thufing pakhatin, “I hmelmama tana meipui i chheh nasat lutuk chuan nangmah kha a hliau hmasa ang che,” a tih hi Hamana hian a tawkbaw ta a ni. Lal Saula pawh khan Davida a itsik a, amah kha phungzawlin a tlu a tlu ta mai a nih kha. Fapa tlan bo û zawk khan a nau lo hawng chu a itsik tlat mai a, a hmaa a hlimna a thlawk bo va, a pain a hâu lo va, a nauvin a hâu hek lo va, amah leh amah a inhâu va, lungngaihna a insiam chawp ta a ni. Mahni hma chauh sialtute hian a tawpah chuan mahni kawng ngei pawh kan sial ping vekthin a ni. Mahni inhmangaih dan dik lo hi a va hlawk lo em !

3. Inhmangaih dan dik : Lal Isuan, "Tu pawh a nun humhim duh apiangin a ch n ang a, tu pawh keimah avanga nun ch n apiangin chu mi ngei chuan a humhim ang," a ti a (Lk. 9:24). He thu hi mahni inhmangaih dan dik zirnaah chuan a formula chu a ni ang. Mahni nun humhim kan duh avangin mahni kan inhmangaih a, mahni kan inhmangaih avangin mi dangte kan itsik a, kan sawi tawh ang khan mahni hmasialtute reng reng chuan mahni nun ngei pawh kan ch n zawk si  thin. Chuti a nih chuan, mahni inhmangaih emaw kan intih hi a lo ni hauh lo mai a, mahni kan inhaw zawk tihna a nih chu. Chu mai chu a ni lo va, mahni leh mahni kan intihlum a, mahni lai h thlan khurah kan inphum tihna a ni ang. Mahni kan inhmangaih avangin z  kan in a, drugs kan rui a, mipat hmeichhiatna kan ch n a. A tawpah chuan kan in bangah "Thihna hming - O.D" tih a int r a, mahni nun humhim duhin kan ch n a nih chu.

Kawng lehlam han thlir leh ila, Lal Isuan, "Keimah avanga nun ch n apiangin a humhim ang," a tih hi a dikzia kan hmu ang. Mi dangte kan hmangaih chuan kan hmangaiha kha a

lawm a, keimahni kan lawm baw k a, kan Pathian a lawm baw k a. Kan nunah hahna a awm lo va, kan taksa pawhin a hrisel phah hial a, mi lawm thei kan tihte reng reng hi mi dangte tilawm  hintu an ni deuh zel mai. A hun laia mi hausa ber Rockfeller a pawh kha mahni hmasial hmingthanga sawi a ni a, mi hlim lo bera sawi a ni baw k. Amahin testimony a sawiah chuan, "Ka rilru hi ni khat chauh tihlim thei an awm chuan ka sum zatve hi ka pe phal e," a ti a ni. A hlimna turin ama hma a sial a, nimahsela Z ntei  ahna hla ang maiin lungngaihna hliir lungngaihna hliir a sual chhuak ta a. A tawpah a inngaihtuah harh ta a, a sum chu mi dangte hnenah a sem ta vak a, a hnenah lawmthu an rawn sawi a, chu chuan amah chu a tihlim ta a, a dam rei phah ta a, kum 50 a niha thi mai tur khan a birthday vawi 90-na a lawm leh ta zawk a nih kha. A nun a ch n ngamna hmunah a humhim ta hlauh zawk a ni.

4. A hlawkzia ka hre ve ta : Chuti a lo nih chuan he thu hi var pawh tura kan inbuatsaih a pawimawh ta hle mai. Mahni inhmangaihna dik tak chu mi dang hmangaih hmasak hi a lo

ni e. Chutih rualin mi dang huat chu mahni inhuatna leh mahni intihlumna a ni bawk. Anih leh chutiang tak chuan kan nun hi kan thlakthleng phut thei ang em? Adama thlah, Lal Isua kraws-in a sawizawi loh nunah hi chuan he formula hi a chawh dik theih loh vang. Kan chhinchhiah tur chu amah Lal Isua ngeiin, “Keimah avanga” a tih lai khi a ni a, amah a tang lo chuan mi dang a hmangaih theih loh a ni. Chu chu heti hian thlir zau leh deuh ila.

Tuna ka huat em em hi Lal Isuan a hmangaih a, Lal Isua hi ka hmangaih chuan a hmangaih chu ka haw thei lo vang. Lal Isuan mi sual ber min ngaidam a, kei chuan tu emaw ka ngaihdam theih si loh chuan inen fiah ka ngai a ni. Chuvangin tu emaw ka ngaihdam theih loh kha a hnenah, “Unaupa, kei pawh Lal Isua ngaihdam ve tho ka ni asin,” tiin Lal Isua avangin ngaihdam theihna a awm a ni. Vaw khat pawh mi pakhat hian a thianpa vuak hlum a tum thu Pastor a hrilh a. Pastor chuan, “E a ni maw, va vaw hlum ngei ang che aw. Amaherawhchu i vuak dawn lai takin, ‘Thianpa, kei chuan ka ngaidam thei tawh lo

che a, ka vaw thlu ngei ngei dawn che a, nimahsela Lal Isuan a ngaidam a che,’ ti la, i vaw nghal dawn nia” a ti a. Pastor sawi ang tak chuan chu pa chuan a va ti a, “Lal Isuan a ngaidam a che,” a tih rual chiah chuan a thing fak ken chu a thlah tawp mai a, a vaw thei ta hauh lo mai a ni an ti.

Chutichuan mahni kan inhmangaihna avanga mi dang itsik thinte hian he subject pawimawh tak mai hi zir ila, ni tinin kan exam a ni tih hre bawk ila, kan pass hunah chuan kan lawmna a sang ngawt ang. Hetianga kan sawi hian mahni hi inhmangaih loh tawp tur kan tihna chu a ni lo. Mi dangte itsikna tel kher lovin mahni kan inhmangaih tur a ni ngei mai a, nimahsela mahni hma kan sial luattuk avanga khawvel hrehawmna hi Pathian thu a tang a um bo a tul a ni. Hmun laili ber chan kan duhna te, lalna leh thuneihna chan kan duhna te, fak leh chawimawi hlawh kan duhna te, lar leh hmingthan kan duhna te, “Kei” kan intih venate hi Lal Isua avanga kan thihsan hunah chuan, “Ka nun eng mah lovah hian engkim ka lo hmu ta,” tiin kan zai hlim thei dawn nia ♦

KTP

— Tlangluaia H. Sellai
NE. Khawdungsei

KTP hi tute nge hruaitu hmasa, eng vanga din nge, eng kum leh thla, nia din nge a nih sawi ka tum hran lo. KTP member kan nih chuan KTP chanchin hi chu kan hre Chiang viau turah kan ngai hlawm awm e. KTP chu thalai nunkawng dik lo zawhtuten kawng dik an zawha an thlarau nun siam thaa nun thara an nun theih nan leh an vanglai hun Lalpa tana an hman theih nana thalaite hruaia kawng dik kawhmuhtu a ni. Thalai kal sual tur venga an tana theih tawpa tang tur leh hma latu atana pawl duhawm tak lo ding a nih hi kan hriat reng a tha awm e.

KTP chu Kohhran tana tangkai thei ang bera awma, Kohhran ban rinawm tak, Kohhran tichaktu, Kohhran

tana thil tha ngaihtuaha mi dang tanpuina zawng lova mahni kea din chhuah tum Kohhran tana chhenfakawm tak Kohhrana pur chaw lova, Kohhran tana ngaihtuahna, tha leh zung seng tur a ni baw.

KTP chu ruihhlo ngaite leh mi awm herhten an belh ngam tur leh an mangana an tluk luh ngamna tur a ni. Ruihhlo ngaite leh mi awmherh deuhten an belh ngam loh leh an thlamuanpui ngam loh KTP a nih chuan a kal her viau a ni mai. Chuvang chuan heng ruihhlo ngaiten an belhtlak leh an belh ngam tak tak theihna turin KTP hruaituten a bik takin kan nun kan uluk a ngai zual hle. Member-ten an harsatna an thlen ngamlohna ka nih chuan kan inngaihtuah ngun a ngai hle ang. Member-te duhsak bik leh ngainat bik neia tihlan vakte hi tih loh hram a tha.

KTP chu pawl dang nena inhrethiam takin a kal hram hram tur a ni. Pawl dang ngaihtuah miah lova mahni

duh dana kal vak mai te hi a awl viau mai a, chuvang chuan pawl dang nena inhrethiam taka kan tih turte indipdal lova kalpui thiam a ÷ul hle mai. Pawl dang vengthawng miah lova kal vak maite hi a awl em em a ni. Committee, hla zir leh hnatlang thlengin pawl dangten inremsiam theih zel hi KṯP chuan tum tlat chi a ni.

KṯP chu mi mawl tifyinga, mi pangngai taka chhertu a ni. Mi rethei zawk tan pawh ngaihngam taka inhman ngamna tur a ni bawk. Mi mawl leh rethei zawkten ngaihngam tak leh zalen taka an awm ngamna turin KṯP hruaitute chuan ngaihtuahna kan siam thiama kan ÷awngkam leh chetziaah kan lan chhuahtir a ÷ul hle. Mi mawl zawk leh rethei zawkten KṯP-ah hmun laili an chang ve tur a ni (mi hausa leh mithiam te tan chauhva din a nih loh avangin). An nun inthlahrung leh inphahhniam tak mai hi an chetzia leh ÷awngkamin hma a sawn zel theihna turin ÷ahnem kan

ngaihpuir tur a ni a. An phak tawkah mawhphurhna kan bel thiam tur a ni.

KṯP chu lehkhathiamte tel ngei ngeina chi a ni bawk. KṯP hawiher hi khawtlang hawiher/sukthlek a ni duh fo. Chuvangin KṯP-ah hian mi thiamte hi an ÷angkai duh em em a, chutih rualin an thiamna hi Pathian hriatpui lovin mihring taka kalpui an tum ve fo bawk. Hetiang thiamna chhuang mite hi pawlah hian an hnawksak duh phian. Mi thiam zawkten kan thiamna hi Pathian hnen aṯanga kan dawn a ni tih hi kan hriat reng a ÷ul hle awm e. KṯP-ah chuan mi fing leh fing lo, hausa leh rethei, zai thiam leh thiam lote pawh an leng a; mahse, Pathian rawngbawl kan ni tih erawh theihnghilh loh a ÷ha hle mai.

KṯP chu rawngbawltu senior zawk leh Junior zawkte tam tak awm khawmna a nih avangin hei hi kan hriat reng a ÷ha awm e - Junior zawkten Senior zawkte hun rei tak an

tha leh zung leh ngaihtuahna leh sum leh pai lo seng tawh, ùan lo fum deuhte ngaih theih lohna a awm fo mai hi thil pawl tak a ni. Senior zawk ten an lo tih hram hram avanga KṚP hi tun thlenga kal a ni tih hi kan hriat chiana a theih chin chinah chuan hruaitu leh member senior zawkte hi kan awl thiamin kan zah der thiam tur a ni. Senior zawkte pawhin member junior zawkte chanvo kan pe thiamin kan dawmkang thiam tur a ni bawk. Kan dam chhunga kan bomb pai - te puahthir mai lova thawh hona ùa kan neih theih nana inhriatthiamna thuk tak neih hi KṚP ropuina tak a ni.

KṚP member ni sia huang chhunga lut lova pawn lam

aṭanga sawisel vak vak hi kan tih tur a ni lo. KṚP hi pawn lam aṭanga thlir ang ngawt a ni hek lo. A chhungah hian cheng ila siam ùat ngai nia kan hriat laite pawn lam aṭanga siam ùat tum ai chuan chhunglam aṭanga siam ùat hi a awl zawk. KṚP member ni si a KṚP che vel lo Uipui tuilian thlir tawp ai chuan kan ngaihtuahna, tha leh zung, sum leh pai te ùahnemngai takin i thawh zawk ang u. KṚP member kan nih si chuan kan Branch KṚP hi a chhiat leh ùat ka kutah a awm a ni tih hi kan hriat reng tur a ni. Mite kutah dah mai lovin keimah ngei hi KṚP-in min mamawh a ni tih hi i hre thar ùeuh ang u. KṚP vul zel rawh se ♦



COUNSELLING MAMAWHITE TAN

Mi mal, nupa, fanau, chhungkua, nulat tlangval, ringtu nun etc.- ah harsatna i neih chuan Family Guidance & Counselling Centre pan ṭhin la, an lo ṭanpui ang che. Telephone leh internet hmang pawhin biak rawn theih an ni.

Main Centre - Mission Veng, Aizawl - Ph. 0389 2324443

Branch Centre - Chanmari, Aizawl, - Ph. 0389 2306693

email : synodfgcc@gmail.com

KTP LEH ZIRNA

— Laldinpuia, Serchhip
Hmar Veng Branch

**Zirna awmzia leh a
pawimawhna :**

Kan thupui hi KTP leh Zirna tih a ni a, tam tak chuan zirna han tih hian zirlai/School kal lai chauh a huap emaw kan ti thin a, mahse hetiang anga lo ring thin te hian kan ring sual hle a ni tih hi kan hriat a pawimawh khawp mai. Zirna/Education kan tih hi a hrihfhahna pui berah chuan *Education is all round development* tih a ni a, a Mizo thawng chuan, 'Zirna chu kawng engkima hmasawwna a ni' ti ila a dik thei ber awm e. Kawng engkima hma lam pana kalna a kawh avang hian zirna hian a huam zau hle a, a thlen chin pawh a thui hle reng a ni.

School zirna hi Education pawimawh ber chu a ni a, mahse school zirna chauh hi education in a tum a ni lo tih erawh kan hriat a tul. Kawng engkima mi dangkhum tum leh kan rualelna zawng zawng pawh hi education hian a huam vek a ni. Ni tin

School-ah kan kal kher tawh lo a ni thei e; mahse, ni tin hian mihringte hian thil thar kan zir reng a, nun dan kan zir reng a, heng zawng zawng hi education-in a tum vek a nih avangin tu mahin zirna hi kan hlamchhiah tak tak thei lo a ni. Pathian fapa Lal Isua meuh pawh khan zirna hi a ngai pawimawh em em a, Temple-ah zirtirtute zingah thuin an thusawi te ngun takin a lo ngaithla thin tih Bible-ah kan hmu a ni (Luka 2:46).

Kan pian atanga kan thih ni thleng hian zirlai zir vek kan ni a, lehkha kan zir a, nungchang kan zir a, khawtlanga nunho dan kan zir a, inzir reng rengin hun kan hman thin. Mihringte chu inzir tura siam kan ni, hla siamtu pawhin '*mihring chauh lo chu zirtir an ngai lo*' a ti. Tu mah lehkha thiam sain an piang lo va, pian tirh atanga ABC bye heart sa tu mah an awm lo. Inzir vek ngai kan ni. Chu chu Pathianin mihringte min siam dan danglam bikna a ni.

Abraham Lincoln-a leh zirna:

Khawvela mi ropui kan tih te leh an thih hnu thlenga mitena an thu leh hla an ngaihsan te hi zirna ngaisang mi leh mi hlawhtling an ni thin.

America President hmingthang tak mai Abraham Lincoln-a kha kan hre theuh awm e. A hun lai khan zirna a harsa em em mai a, mahse chuti chung chuan Abraham Lincoln-a khan lehkha a zir tang tang a, mi thenkhatten theih loh nia an ngaih pawh kha a ti thei zel a ni. A hun lai khan zirna school an bul hnaiah a awm lo va, ziak leh chhiar thiam tawh phawt kha chu zirtirtu atan an ruai nghal tawp mai thin. A hun lai khan pawisa a la awm mumal loh avangin zirtirtute hlawh ber chu ei leh in an neih ang ang hlui kha a ni mai a, chuang chuan Lincoln-a te ang mi rethei tan chuan zirtirtu tha neih kha chu vana rah ang a ni.

Kum 6 mi a nihin Lincoln-a chuan zirna school pangngai rap ve tanin an awmna a tanga mel 4 zeta hlaah school a kal thin. Lehkhabu chhiar hi a zirna pui ber a ni a, mahse amahin lehkhabu pakhat mah a nei lo thung. Mi lehkhabu leh a bulhna vela chhiar chi a hmuh theih zawng zawng a chhiar a, mel 20-a hla pawh lehkhabu hawh turin a kal peih a ni. Englai pawh tih theihin a hun awl zawng zawng lehkhabu chhiar nan a hmangral a, a thianpa Dennis Hanks-a phei chuan,

“Abe hi lehkhabu engemaw tal keng lovin ka hmu ngai lo’ a ti hial nghe nghe. Zirna a ngaisang a, chuang chuan khawvel ram ropui ber America President hial a ni thei a, America President awm tawh leh a hnua president zawng zawng zingah pawh Abraham Lincoln-a anga chanchin ngah leh miten a chanchin an sawi nasat hi an la awm lo an ti hial a ni.

Mi thiam an pawimawh:

Mizoram hi kan literacy percentage (91.58%) a san ang huin mi thiam leh ram leh hnam tana ngaihtuahna seng peih kan tlem. Kan ram ro inrelbawl dan te, kan ram kalphung fuh theih lohzia te, development aia corruption tawngkam kan hre zing zawk tlat te hi han ngaihtuah chian hian kan ram hian mi thiam, ram hrulaitu tlak leh mi inzir peih kan tlakchham zia a tar lang Chiang hle a ni. Literacy Percentage-ah chuan India ramah dinhmun sang ber dawttu nihna kan hauh mek a, mahse ram hmasawwna leh inrelbawlna that kawngah chuan a tawp lam a tanga chhiar chi kan ni ngei ang.

Kan ram hrulaitu tur mi thiam hi kan ram hian a

mamawh em em a ni. Tih tak takah te chuan kan rama eirukna leh sum chingpen tam em emna chhan pawh hi mi thiam tak tak lo, sum leh paiin a bual at mai theih miten hun remchang an neih fo thin vang hi a ni. Tunlai khawvelah chuan thangtharte hian mi thiam kan zawng a, mi thiam kan mamawh em em tawh a ni. Pawl/Kohhran/ram hruai tur chuan mi thiam miin an zawng zel tawh. 'Ani chu a fel', 'A taima' tih ringawt hi pawl leh Kohhran thalai hruai turin tehfung a tling tawk tawh lo. Chu ai chuan mi thiam leh hawiher zau, tunlai khawvel kalphung hrethiam phak leh Pathian thin mi hi pawl leh Kohhran hruaitu tur pawh hian kan mamawh tawh zawk a ni.

KTP leh zirna:

KTP leh zirna tih hian kan rilrua zawhna awm nghal tura ka rin chu zirlai tan KTP-a inhman hi a pawiem? tih hi a ni. He zawhna hi a chhangtu azira chhanna inang lo thei tak a ni a, mahni ngaih dan han sawi ta ila, he zawhna hi zirlai hruaitute zawt ila chu an chhanna tur chu zirlai nih chuan kan zirna kan ngai pawimawh ber tur a ni. Zirlai tha taka kan zir hi kan rawngbawl na a ni a, chuvang

chuan kan zirlai ngawr ngawr kha kan ngaihtuah mai tur a ni an tih ka ring. KTP hruaitute zawt ve thung ila chu Kristian nih chuan Kohhran Thalaiah te hian inhman tur a ni a, kan zirna hlawhtlinna hi Pathian a nih avangin ama hnena kan lawmthu sawi vena chi khat a ni a, chuvang chuan zirlaite tan KTP-a inhman hi a soal lo reng reng, nula tlangval nih ve tawh chuan KTP a inhman loh hi a zahthlak zawk a ni, kan tih ka ring.

Keimah han inzawt ta ila ka chhan dan chu Zirlaite tan KTP a inhman hi a pawi lova mahse chin tawk neih tur tih hi a ni. Zirlai kan nih chuan kan zirna hi kan ngai pawimawh em em tur a ni a, kumtluana zir ve si FAIL nih te hi a zahthlak em em a ni. Kan zirlaibu reng reng hi mi thiamten uluk taka mihring rilru zir chung a an siam a nih avangin mi pangngai leh rilru tha pangngai kumtluana zir ve tan chuan passed-na tur a awm a ni. Kan fail thin chhan hi a ruken han inchhui inchhui ta ila puhmawh tur kan neih theuh ka ring. Zirna pawn lama thil dang kan fawmkem nasat lutuk vang a ni fo baw. A bikin KTP member tan phei chuan fail hi a zahthlak em em a ni. Vanduai

vang leh eng emaw rokhawlhna chu awm thei a ni, mahse chutiang ni si lova mi hrisel pangngai ni bawksi, kum tlwana zirlai zir ve si kan fail a nih chuan a chhan eng emaw a awm a ni.

KTP a inhman tirh hian kan phur tlangpui a, kan inhman tirh phei chuan kan phur lutuk thin hi hruaitute zawk hi kan duh khawp lova kan nawr tut tut zawk lek lek thin. KTP activities te hi nuam kan ti em em mai a, hnatlang te hi an koh khat deuh chuan kan khawhar thei em em mai a. Tin, zaipawl hla zir mawlh te hi nuam kan ti thin. Zaipawl hla zir te hi an koh khat deuh chuan kan khawhar em em a, kan hruaitu deuh te an awm khawm let let tawh hi chuan mawi leh mawi lo pawh sawi lo hian tel ve hi kan tum tlat a, nuam kan ti thei em em thin.

Heti ang hi KTP a kan inhman tirh laia kan rilru put hman a nih fo avangin a bik takin zirlai tan mahni in-adjust thiam loh phei chuan tlakchhiat phah a awl em em a ni. Chuvang chuan zirlai kan nih chung chuan KTP a kan inhman a nih pawhin inhman dan chin tawh, active dan chin tawh kan thiam

a tul hle a ni. Hnatlan apianga thulh ngai lo, hla zir leh rem apianga tel zat zat thei mahse exam-naa passed thei reng reng lo kan nih chuan kan KTP a inhman na khan mite nunah thu a sawi tlem khawp ang. Zirlai kan nih lai chuan KTP a inhman dan chin tawh kan thiam a tul hle a ni. Zirlai KTP member-te hi kan hruaitute hian activities ah hian phut dan chintawh, beisei dan chin tawh an nei em em a ni tih hi kan hriat a tha.

A tawp berah chuan KTP leh Zirna hi mi tam tak chuan a inkalh emaw an ti thin a, mahse a inkalh reng reng lo. An hriat fiah tawh loh vang mai mai a ni. Zirna hi nitin mamawh leh he khawvela kan neih ngei ngei tur a ni a, KTP erawh hi chu kan thlarau nun kaihhraina a ni. KTP leh Zirna kan kaihkawp danah hian a rualkhaia kan kal erawh a ngai, KTP hlamchhiaha zirna ringawt ngaihtuah hian chatuan nunna min pe thei lo va, zirna hlamchhiaha KTP active tak mai nih ringawt hian kan rawngbawlnaah rah a chhuah thei lo. KTP leh zirna hi kal rualpui ila, indip dal si lovin keng kawp ila chu chuan kan rawngbawlnaah nasa takin hma a sawn dawn a ni♦

Heti zawk hian le!

— David Laltlankima
Ramhlun East Branch

KTP Gen. Conference kal haw apianga rilrua awm ziah thin chu thalai heti zat lai mai Pathian fak duhna thinlung pu an la awm ziah hi a va lawmawm em' tih hi a ni fo thin a, a lawmawm hle reng a. KTP member tam dan atanga chhut erawh chuan rilru a hmin kim lo fo thin.

KTP Branch tin hian mutanna inang tak kan nei vek a, chu chu member hla kan tihte hi an ni. Mahni thiam dan dana hma kan la chung pawhin a sawt mawhin an nghet mawh hle a, chu chuan ngaihtuahna a ti tamin tun hunah pawh hian rilru a luah thuk hle reng a ni.

Eng vanga mi hla hnuhhnaihna kawnga ke pen chak thei lo nge kan niha, KTP-a inhmang tam tak nun hian mite hnena thu a sawi loh fo thin tihah pawh hian ngaih dan a sai sa hlein a rinawm a. Chhan hrang hrang zingah a bulpui ber

chu 'tawngtai' pawimawhnain kan thinlunga hmun a chan tam tawh loh vang a ni ber mai.

Tawngtaina hi thalaite zinga zawrh tur chuan mi fel tak tak awm bawh mahse thil huphurhawm tak a ni a, chungte hlei hlei chuan ngaihtuahna pawh a ti thuanawp hle a ni. Ringtu nunah chuan rethei leh hausa te, lehkhah thiam leh thiam lo te, naupang deuh leh upa takte kan tih tur a inang tlang vek mai a. Chuvangin thalai tam takin tawngtai tur awm deuh bika kan ngaih tlatna hi kan paih a ngai ta a ni.

C.H.Spurgeon-a chuan, "Kan duh emaw duh lo emaw tawngtai hi Pathian duh zawng a ni' a lo ti a, a dik hlein a lang. Tawngtai chungchang hi kan Bible, Thuthlung Thar buah ringawt pawh wawi 200 chuang a inziak a, Isua meuh pawh kha tlangah te, thlaler hmunah te tawngtai turin a kal fo va, zankhua ten a tawngtai thin. Tawngtai hi Pathian duh zawng a ni a, Isua zirtirna tam tak zinga pakhat a ni.

John Calvin-a chuan, "Pathian ram zauhna leh Setana hnehna hmanrua a ni' tiin tawngtai hlutna a lo sawi a.

Hallerby-a pawhin, “Van thiltihtheihna kan lak thlakna hmanrua a ni’ ti hialin a sawi baw. Lal Solomona lal ropui tak a nih theih chhan chu a mite enkawl a thiam theih nan Pathian hnenah finna dila a ṭawngṭai vang a ni (I Lalte 3:6-10). KṭP hruaitu ni chung a ṭawngṭai ka lo ngaihthah viau a nih chuan a fel dawn lo va, ka thlarau lam nun ka en fel vat a ngai tihna a ni. Andrew Murray-a chuan, ‘Ṭawngṭai ngaihthahna سوالين a tihchian chu - Pathian thlarau keimahnia awm ṭhin kha thih ngama nain a chau em em a ni tih hi’ tiin a lo sawi a, chutiang ang nun aṭang chuan member hla hnuh hnaih an harsa tawh ṭhin.

Ṭawngṭai hrim hrim hi a ṭhatna chu Pathian duh zawng tak a ni. Epaphra chu Kolossa-a Kohhran ho tan ni tin a ṭawngṭai ziah ṭhin a, Bible pawhin inṭawngṭaisak ṭhin turin min ti baw (Jakoba 5:16). Raven Hill-a chuan, ‘Van ramah hian inchhir na tur awm ta se mi dang tana ṭawngṭai tam taw loh vang a ni deuh ber ngei ang’ a ti hial a. He ṭawngṭaina hi kan Branch ngui min tiharhtu leh nun tichaktu tur, Pathian nena inlaichinna ṭha min siamsaktu tur a ni.

Ṭawngṭaina chhangtu kan Pathian chet duh hun hi hriat thiam a har hle a. William Carey-an India rama kum sarikh rawng a bawl chhung khan thlarau bo pakhat chiah a man a, Adoniram Judson-an Burma rama rawng a bawl chhung khan ringthar pakhat chiah a nei baw. Chumi a nih avang chuan an thawk ṭha lo tihna a ni hauh lo. A chang chuan kan ṭawngṭaina te hi chhanin a awm thuai a, chumi avanga a chhanna hmuh nghal vek tum chu a dik lo vang. George Muller-a chuan, ‘Dawhthei takin, rinna nen- a hlawhtlinna kan hmuh hma chuan kan ṭawngṭai mai tur a ni’ a lo ti a. Member hlate kan hui kal duak duak thei lo a nih pawhin kan beidawng tur a ni lo vang. Lal Isua pawhin a zirtirte beidawng lovin an ṭawngṭai fo tur a ni a tih kha. He pawl ropui tak hi sawisela a awm loh nan te, member hla zawkten Biak In lam an lo pan theih nan te, rah chhuah nun kan neih theih nan te he ‘ṭawngṭaina’ hi a ki pui berah hmangin heti hawi zawng hian ke i pen ang u tiin kan inngen a ni.

Lalpan Malsawm rawh se ♦

KOSOPCHERRA KOHHRAN BIAK IN KAN SA

— Tv. LR Chhuanvawra
Secretary, KTP, Zotlang Br.



Zotlang Branch hi Champhai Town Area chhung, Ruantlang Pastor Biala awm kan ni a, Branch member zaruk chuang zet awmna kan ni. Kum 2009 khan Home Mission South Sumasumi-ah Biak In sain Work Camp kan lo nei tawh a, zawnghhangthlak kan tiin Work Camp hi neih leh kan chak a; mahse khawchhak kil aţang chuan sum sen a hautak em avangin chak viau thin mah ila Work Camp hi kan nei leh lawk thei lo a. Kum 2013 Branch Kum thar Committee chuan Work Camp neih leh ni se tiin a rel leh ta a. Tichuan, theihtawp chhuahin kum tir aţangin hma kan la nghal a, Bialtu Pastor-in Work Camp neihna hmun turte min ngaihvenpui

reng baw a, tichuan member 29, mipa 17 leh hmeichhia 12 kalin Pathian hruaina leh awmpuina zarah October, 2013 chawhnu lam khan Assam State, Cachar Kahrawt Pastor Bial Kosopcherra Kohhran Biak In kan zuk sa thei a, kan lawm hle a ni.

Kosopcherra Kohhran chanchin :

Kosopcherra Kohhran hi Cachar Kahrawt Pastor Bial chhunga awm a ni a, kum 1988 vel aţanga lo ding ţan tawh kha a ni a, a tirah chuan Nl. Dawngi leh Nl. Zari ten Missionary niin 1991 khan Kosopcherra hi an chhuahsan a ni. Chuta ţang chuan thawktu mumal nei lovin an lo khawsa ve naw naw a, Kohhran mi thenkhat sakhaw danga lo inlet leh te pawh an awm a ni awm e. Chutianga kaihruaitu mumal nei lova hun eng emaw chen an kal hnuah kum 2013 January thla aţang khan Mizoram Synod chuan Tv. Saitea a dah leh ta a. Ani kaihhruaina zarah Kosopcherra Kohhran pawhin inkaihhruaina fel

zawk neiin pangngai takin an kal chho leh òan a ni.

Work Camp kawng :

Ni 28/10/13 thawhtan zing dar 7:00-ah Zotlang Kohhran Biak In kawt aòangin kan chhuak a, zing dar 10:00-ah Kawlkulhah tukthuan kan ei a, tluang takin kan kal zel a, zan dar 7:30-ah Kolasib kan thleng a, Hotelah zanriah kan ei hnuin Kolasib Venglai Kohhran Biak In a zan riak turin kan inngnat a, Kolasib Kohhran hian min lo dawngsawng tha em em a, Kohhran Chairman hovin, Kohhran Secretary leh Pro. Pastor te bakah Kolasib Venglai KTP hruaitute nen min lo hmuak a, an chungah kan lawm em em a ni. Kolasib aòang hian zing dar 7:00 velah kan chhuak leh a, Bairabi lamah kalin zing dar 10:30-ah Katlicherra kan thleng a, Katlicherra khuaah hian Tv. Saitean (Kosopcherra-a thawktu) in min lo hmuak a, Hotel chaw eina tur min lo ruahman sakah tukthuan puar takin kan ei a ni.

Katlicherra hmunah hian chakkhaite lama rei vak lo kan chawlh hnuah kan kal zel a, motor kal theihna tawp khua Kacharithal kan thleng ta a, he khuaah hian Kosopcherra Kohhran thalai member-ten min lo hmuak a, kan thawmhnaw leh bungbel te min kenpuia kan zangkhai phah hle a ni. Kosopcherra khua 5km zeta thui chu kein kan pan ta a ni. Darkar khat leh a chanve vel zet kan kal hnu chuan tlai lam dar 3:00-ah Kosopcherra khua chu kan thleng ta a ni.

Biak In sak dan tlangpui :

Kosopcherra kan thlen tlai aòangin Biak In sak kan òan nghal a, ban khur choin, ban thenkhat kan phun nghal a ni. A tuk nilaini zing varñian aòangin kan bung nghal a, mistiri mumal kan awm loh avangin tlawmngai turin Pu Lalrammawia, Pu Lalrongenga leh Pu HT Lalropuiate kan sawm a, anni kaihhruaina hnuaiah tluang takin Biak In sak hna kan thawk thin a, an chungah pawh kan lawm em em a ni.

Zirtawpah luah theihin kan peih fel thei ta a, kan thawk rim tlanga zing varṭian aṭanga thim ṭhak thlengin kan thawk ṭhin a, tu mah han zelthel leh zawmthaw bik awm lovin kan theih tawk kan chhuah tlang a, kan hna pawhin a sawt phah hle a ni.

Biak In hi a dung 36ft. leh a vang 15ft. a ni a, hei bakah hian vestry 6ft. leh in te 8ft. a tel bawk a ni. Tichuan a vaiin a dung 50ft. leh a vang 15ft. a ni a, tukverh pathum leh ventilation pathum, a bang lehlahm lehlahmah hawn a ni bawk.

Work Camp haw kawng :
Kosopcherra-ah hian


Pathianni hmang lovin inrinni zingah khua kan chhuahsan a, Silchar Mission Compound-ah dar 11:00am velah tukṭhuan kan ei a, bazarna hun thawl tlem kan insiam hnuin tlai dar 2:00-ah Silchar chhuahsanin kawng lakah chawlh pawh awm mang lovin tuang takin kan tlan zar a, Thingdawlah zanriah eia kan chawlh det hnuin chawlh awm miah lovin kan tlan par a, zing dar 4:00 pelh hretah kan khua Zotlang kan thleng leh ta a ni.

A tawp berah chuan min hruaina leh min awmpuina zawng zawng avangin Pathian hnenah lawmthu kan sawi mawlh mawlh a ni♦



■ *Ruih chilh atan chuan eng mah hi a ṭha lo va, a ṭha lo zingah chuan **zu ruih** hi a ṭha lo ber a ni. Hriselna a tichhia a, rilru a pawt hniam a, mihring khaṭwsak dan phak lova min siamtu a ni. Thuruk a puang zar a, buaina a thlen ṭhin a; hurna leh zah theih lohna a ken tel avangin a hlauhawm a ni. Zu rui buk buk chu mi fing hmuha hmuh tur an awm ngai loh avangin i ruih chuan mi a dik tak i ni mai. Zu rui chu mihring ena en chi an ni lo; a chhia leh a ṭha te, a mawi leh mawi lote thliar hnan nachang hre lo ramsa nen an in-ang chiah a ni.*

-Penn



HRINGLANG TLÁNG

Putar pakhat, kum 80 chuang zan tawh tur hi zing lam dar 8:30 velah kan dawrah hmanhmarawh tih hriat zet hian a rawn lut a, a kutzungpui thuina phelh tura doctor hmu tura lo kal a nih thu min hrilh nghal a. Kei chuan doctor chu dar 9 hma chuan hmuh theih a nih loh thuin ka lo chhang a. Thutna ka kawhbmuh a, chutah chuan a thu a.

Putar chuan a sana a bih tuak chhen avangin a hmanhmarawh hle a ni ang tih ka hre mai a. Damlo dang buaipui tur ka nei lem lo bawk a, a bulah thutna ka rem a; a kutzungpui thuina chu ka lo ensak vel a, a lo dam tha hle nghe nghe a. Ka doctor-pui pakhat chu kovin thil awmzia ka hrilhfhah a, ani chuan a thu phelhna hmanrua min rawn pe a; tichuan a kutzungpui thuina chu ka phelhsak ta a. A thuina ka phelhsak lai chuan, "I hmanhmarawh hmel tehlul nen, engti ziaa doctor dang pan mai lo nge maw i nih le?" tiin ka zawt thuphung a.

Ani chuan, "Ka nupui hi in dawr atang hla lo te, Nursing Home-ah hian a awm ve a, chutah chuan tuk tin tukthuan kan kil dun thin a. Tukin pawh hian ka nupui nen chuan tukthuan kan kil dun leh dawn a, hmun hla tak pan ai chuan tiin in dawh hi ka rawn pan a ni," tiin min chhang a.

Kei chuan, "I nupui chu a that chhuah leh ngei ka beisei," ka ti leh a; mahse putar min chhanna chuan min tihnuat rawih mai. "A tha chhuak leh em ang chu. Mahse ka nupui chuan Alzheimer's Disease an tih hi a vei alawm maw le," tiin min chhang ta a. Kei chuan a rilru tur hriat thiampui tak chung hian, "I hunbi tiam aiin tlai ta deuh la, i nupui chu a thin a lo rim hle lo vang chu tirawh?" ka ti leh a. Putar chuan, "Rim lah lo ve a. A natna hian a rilru thlengin a khawih buai tawh a, kum 5 chhung chu a hriat pawh min hrechiang tawh bar hlei nem," tiin min chhang a.

Kei chuan makti zet hian, "Chuti chung chuan i nupui chu tuk tin tukthuan i kilpui ziah tho va maw?" ka lo ti chiam a.

Putar chuan nui chunga ka dara ben thap thap pah hian, "Ka nupui chuan tu nge ka nih min hre tawh lo pawh ni se, keiman tu nge a nih ka hria alawm," tiin min chhang ta a.

Putar chhuak ta chu ngaisang em emin ka thlir zui vawng vawng a, "Chuti ang tak hmangaihna chu a ni kei pawhin ka mamarawh chu ni," tiin ka phun chhuak a.

— Eric Doyle

■ ■ ■ RIMAWI

ZAIPAWL THA

- R. Lalremthanga
Lungdai Hmarveng



Mizote hi zai ngaina tak kan ni a. Zaipawl thiam tak tak lah an thahnem ta hle. Kohhran a dinna apiangah Zaipawl din a ni deuh zel a. Kohhran member leh KṮP member tamnaah chuan zaipawl member pawh an tam deuh zel a. Zaipawl tha tak nei Kohhran nih pawh a nuam hle. Zaipawl neih that te hi thil harsa tak a nih rualin thlarau lam inpekna rawngbawl na a nih avangin inngaihtlawmna, thuawihna tel lo chuan zaipawl tha neih a har hle.

Zaipawl hi KṮP rawngbawl na pawimawh tak a ni tih hre reng ila. Zaipawl tha kan neih theih nan KṮP Branch Office

Bearer te hian hma hruaiin kan member-te huikhawm thiam ila, hei hian Zaipawl tha chu a siam thei ngei ang. Conductor leh KṮP hruaitute thawhhona tha hian nasa takin Zaipawl a ti tha ngei bawk ang.

Zaipawl tha tur chuan kan hla zir tur thlan thuah Conductor te an pawimawh hle. Keini Kohhran Zaipawl te hian heng hla lam hi zir ila kan tui tlang ang tih turte hi thlang thiam ila. Tunlaiah chuan Zaipawl uniform nen hla mawi tak tak Demand channel-ah kan sa a, a tha e. Chutih rual chuan kan Mizopa hlapui te, Handela hla kan tihte hi sa uarin i zir uar ang u. Chung hla kan sak thiam chuan Zaipawl te

hian solfa lamah pawh hma kan sawn ngei dawn a, KṚP member nih chhunga Mizo hlapui leh Handel-a hla sa miah lo ngawta awmte kan awm thei mai awm a nia. Branch tinte hian kan Mizo hlapuite hi Bial angte pawh hian intihsiakna nei ṭhin ila. Zaipawlte pawh hian kan hlawkpuiin hma kan sawn phah hle dawn a ni. Keini Presbyterian Kohhran inkhawmpui hmang ṭhinte phei chuan kan inkhawmpui - Synod, Presbytery leh Bial inkhawmpui, Bial KṚP Conference, KṚP General Conference-a ngaithlatuten a thute pawh an lo hriat, a thlukte pawh an lo hriat ṭhan tawh, an lung tileng tur chi tak Zaipawl sak chi ngei thiam taka an han sa chu a hlu hle a ni tih hria ila.


Tuna kan hla zir ṭhin hla thar kan tihte thiam taka kan sak ai hi chuan hlapui ngei maia Lalpa fak hi i uar thar leh teh ang u. Ngaithlatute hian hla thar hi an hriat loh a nih hian an ngaithla liam puat a, an rilru tak an pe lo tlangpui a ni tih hria ila, a satute tan a ṭhat viau lai hian a ngaithlatute lam hi an pawimawh zawkin an tam zawk a ni tih hriain Zaipawlte hian heti ang hlate hi uar thar leh ila, kan ṭhatpuiin hma kan sawnpui ngei ang maw le.

Rual u deuh leh Kohhran mipui tam zawkte lung kuai hla sak hi Zaipawl ṭha, Zaipawl thiam nihna a nih avangin heti ang hla hi thlang thiam ila Zaipawl ṭha kan ni zel mai dawn a lo ni.



■ *Mi pakhat hian Fanny Crosby hnenah, "Pathianin talent a pek ṭhat tehreng che nen hmuh theihna a pe tel lo che hi chu a va han pawl tak em!" a ti a.*

Ani chuan, "Ka pian hlim khan Pathian hnenah dil thei ni ila chuan eng mah hmu thei lova min siam turin ka ngen ngei ngei ang. A chhan chu maw? Vanram ka thlen hunah ka mit a var ve anga, Isua Krista hmel ngei chu ka thil hmuh hmasak ber tur a ni dawn asin," tiin a chhang daih.



Hriatzauna

ROCHUNGNUNGA
College Veng, Aizawl

WWJD

Sticker-ah i hmu chāmchi tawh mai thei, bracelet leh T-shirt velah pawh he consonant 4 hi a lar khawp mai. Kristianna nen chuan a inzawm ngei mai a, mi thenkhat chuan a lam pum pawh hi kan hre meuh lo mai thei, mahse he thu hi Kristiante nunah chuan thil pawimawh tâwpkhawh a ni bawh si: "Isuan engtin nge a tih ang?"

Lehkhabu

1896 kum khan Charles Sheldon-a chuan a lehkhabu ziaik 'In His Steps' a chhuah a, he lehkhabu hian hnuhma lian tak a la hnutchhiah ang tih Sheldon hian a hre lâwk kher lo vang. He lehkhabu hi lehkhabu danglam leh maksak tak a ni lêm lo va, chutih hun laia Kristian lehkhabu tam tak ang tho a ni a, a chhûngah hian Sheldon-a'n

Topeka, Kansas-a Congregationalist kohhrana a thusawi, sermon a dah a. Sheldon-a Pathian thu sawi tam ber chu Christian Socialism lam hawia ni.

Sheldon chuan a lehkhahuah chuan Kristian nun chu thuhlâwm pakhatin kaihruai se a duh thu a ziaik a, chu thu chu 'What Would Jesus Do?' hi a ni. Sheldon chuan Isua chu kan chhandamtu a nihna anga kan en mai bakah, kan ni tin nuna kan entawn ber ni turin a duh a. A thu kalpui dân chu Social Gospel kan tih, mi tanpui a, ei tur nei lote ei tur pe a, Pathian thu chung mite hnena thlen a ni a, WWJD pawh hi chutiang rilru aţang chuan Sheldon hian a phuah chhuaka.

Dialogue

'In His Steps' lehkhahuah hian Rev. Henry Maxwell leh chenna tur nei lo pa pakhat inbiakna chungchang a tarlang

a. Rev. Maxwell chuan chu mi rethei pa chu a nunah Isua la lût turin a sâwm nasa hle a. Mahse, mi rethei pa chuan Kristiante thu sawi hriatthiam har a tih thu a sawi a, Kristian tam tak chu an that hmel tehreng nen, mi rethei leh ngaihsaktu nei lote an hlamchhiah hle niin Rev. Maxwell-a chu a lo chhâng a.

Chênna in nei lo chuan, "Mi thenkhat Biak In chhûnga an zai leh ãawngtai ka hre ãhin a...[an engkim Isua tan an ti ãhin a], Biak In kailâwn bula ãhuin ka lo ngaithla reng ãhin a, eng an tihna nge ni ang. Ka tan chuan khawvel hi harsatna namên lo hlir awmna a ni ber mai a, mahse Biak In-a zaia ãawngtai ãhinte tan chuan a ni lo pawh a ni mahna. Kei chuan heng thil hi hriatthiam har ka ti a ni. Tuna ka dinhmunah dingte hnenah hian Isua ni ta se engtin nge a tih ang? Biak In chhûnga zaia ãawngtai ringawt hi em ni a hniakhnung zui i tih awmzia hi? A châng chuan Isua zui tih hian hetia thawmhnaw ãha ber ber nena Biak In lian tak taka inkhawm a, chênna tur in ãha tak neih a, chuta inkhawm bâna luh bo a, pawisa pawh nawmchenna lam

www.mizoramsynod.org

thilah leh mahni nawmna tura hman a, nipui chawlh hman tura khawiah emaw kal hi a kâwk ber ãhin a, chutih lai chuan mi rethei, chênna in pawh nei lo, hna zawnga kawthhlera vak vak, retheihna hnuaia seilian Biak In pâwnah tam tak an awm thung si a ni," tiin Rev. Maxwell a hrilh a.

Sheldon chuan Kristiante chu an awmna hmun apiangah leh an mi tawh leh hmuh apiangah 'Isua ni se engtin nge a tih ang?' tih zawhna an inzawh fo a duh a, kan ni tin khawsakna leh kal velnaah te, hna kan thawhna hmunah leh Biak In kan panna kawngah te Lal Isua hnungzuitu kan nih chuan a hmangaihte tana thawk turin a sâwm a ni.

Sumdawwna

WWJD lam pum hi "What Would Jesus Do?" a ni a, Kristiante zinga campaign-na ãawngkam lar berte zinga mi a ni a, ãhalaite nen a inzawm a ni. 1989 kum kha a ni a, Central Wesleyan Church, Holland, Michigan-a ãhalai pastor Dan Seaborn an kohhran ãhalaite logo tur a ngaihtuah a, Charles

Sheldon-a What Would Jesus Do tih hi a hman chhuak ta a ni.

Lesco Company-a mi Ken Freestone-an WWJD hi kawra tar turin, badge ang chiin an print hmasa ber a. A hnuah Freestone-a leh a unaupa'n wristband-a siam a tha dawn riau in an hria a, wristband-ah an siam a. 1996 kum ringawt khan wristband, WWJD chuanna 2,50,000 chuang an hralh a, CNN-in a chanchin a chhuah hnuah a hralh a kal leh zual a, 1997 atang khan 15,000,000 zet an hralh tawh a ni. He campaign logo hi a lar tawh hle a, bikers pawl hming atangin radio station hming thleng WWJD hi hman a ni a. Wristband, t-shirt, sticker leh thil dangah hman lar a ni nasa tawh a, khawvela Kristian logo, kraws tih lohah chuan hman lar ber a ni ngei ang.

Thu buai

WWJD vang hian mi thenkhat chuan thu buai an lo neih phah tawh a. Chung zinga pakhat chu kum 2008 July thla khan Minneapolis-ah a thleng a. Minneapolis-ah hian Bullseye Collection Agency a awm a, an motto-ah WWJD an hman a,

www.mizoramsynod.org

lehkha an thawn chhuahah reng reng WWJD a awm zel a. Anmahni dawrtu hlun ve tak Mark leh Sara Neill te chuan Bullseye atanga an thil dawn reng rengah WWJD a awm ziah a, chu chuan an zalenna a bawhchhiatsak a, a rap bet a ni, tiin, an sakhaw zalenna ngaih pawimawhsak lovah an puh a. Bullseye chuan, he thu hi taima tak leh zahawm taka thawk tura mite an hriat thar tirna hmanrua a ni tiin an tang a. Bullseye hian khinglêtin, eng dân pawhin WWJD hi an khap a nih chuan dân dik a ni lo va, Bullseye-ina Freedom of Speech an neih te, Freedom of Religion an neih te a kalh a, a dodal a, danina equal protection of law a phalsak an palzûtsak a ni, an ti thung a. A tawpah chuan Bullseye hian thiam an chang ta zawk a ni.

I ni tin nunah khan *'Isua ni se engtin nge a tih ang?'* tih hi ngaihtuah nawn fo la, i hnathawhna hmunah te, i zirna hmunah te, i awmna apiangah he thu hi nangmah kaihruaituah hman tum ang che. I tih thin leh i sawi thinte kha Isua ni ta se a tiin a sawi vein i ring em? What Would Jesus Do?

HRISELNA ■■■

AMPHETAMINE

Dr. Vanlaldiki Ralte
Psychiatrist

Engnge ni Amphetamine chu?

Amphetamine hi psychostimulant drug a ni a. Chumi awmzia chu rei lo te chhung thluak leh taksa hnathawh hrang hrangte a pangngai bakah a ti ðha/a ti sang/ati chak ðhin a ni. He damdawi hi, ADHD (Attention Deficit and Hyperactive Disorder), barcolepsy leh depressive disorder atan hman ðhin a ni.

Amphetamine hi group hnih a awm a, chungte chu :

1. **Classic/Major Amphetamine** : Classic Amphetamine hi chi-3 a ðhen a ni leh a-

a) Methamphetamine - (crystal, ice, upper, speed meth, chalk etc.)

b) Dextroamphetamine

c) Methylphenidate

2. **Designer amphetamine** :

www.mizoramsynod.org

a) MDMA (ecstasy), b) MDEA
c) MMDA d) DOM

Methamphatamine leh MDMA te hi amphetamine type stimulant (ATS) tia hriat a ni.

Amphetamine thawh dan?

Classic amphetamine te hian thluaka chemical chi khat dopamine level hi a ti sang vak ðhin. He dopamine level sang ta vak hian phurna leh hlimna nasa takin a siam a ni. ADHD, depression leh Narcolepsy natna atan damdawi ðha tak a ni a, amaherawhchu hman sual chuan damdawi hlauhawm tak a ni.

Amphetamine hian engtin nge thluak a tihchhiat dan?

Amphetamine hian thluaka dopamine a pangngai ai bak a tihchhuah reng avangin zawi zawiin dopamine receptors te hi an chhe ðhin a. Hei hian 'pleasure centre' leh cognitive ability (suangtuahna, rem hriatna, thu tlukna siam thiamna, hriatna, finna, fel taka thil thliar thiamna etc) hi a khawih chhe ðhin a ni. Plea-

sure centre a chhiat chuan, nuam hriatna te, phurna te a bo vek thin a ni. He damdawi ti thinte hian an bansan chuan zawi zawiin pleasure centre hi a rawn insiam tha leh thei a, amaherawhchu cognitive ability hi a ti chhe hlen thei a ni.

Amphetamine damdawi hi miin a hman sual reng chuan thluak hnathawh nasa takin a tibuai thei a, thinrimna nasa tak te, ngaihruatna tha lo entir nanthil tha lo thleng dawn tlatna hriatna te, thil ni lo ni anga ngaih ngheh tlatna te, entir nan - miin an hua emaw tih tlatna te, tura hrai tur nia ngaihna te, miin an enthla nia ngaih tlatna te, miin an that dawn emaw tih avanga hlahna nasa takte leh mi hriat theih loh thawm/aw nasa takte an hriat bakah zan mut theih lohna te leh a dang dangte an nei thin a ni. Amphetamine damdawi avanga rilru buaina neite chu 15% (zaa sawmpanga) vel hi chu an dam thei tawh lo a ni.

Tin, heng bakah hian insum theihna te tichhiain,

tualthah hialna te pawh a thlen thin bawk a. Tin, a tawpah chuan mi tana hlahhawm an nih bakah anmahni nunna hial lak duhna pawh a thlen fo thin a ni. Overdose avang pawhin an thi fo thin.

Amphetamine damdawia ruih lan dan tlangpui :

- Uchuaka phur leh hlim
- Pangngai aia tawng tam
- Che reng
- Khur der der a nih loh pawhin phut zek zek
- Riltam thei lo
- Thin chhiat lutuk
- Hlah neih reng
- Hah theih loh, zan mut theih loh
- Mit naute a lian
- Thawk harsa an ti
- An lu a hai
- An ha an thial nasa

Hman sualin a rei hnuah a lan dan :

- Chauh ngawih ngawih leh hlim theih loh
- Mahni vun leh kawr hak lai te an sik an sik a nih loh pawhin an hiat an hiat thin.

- Mang ruai, mahni finna hman thei lo, rilru buai.
- Thinrim uchuak mi kutthlak emaw mi paw khawih an awlsam hle.
- Intih faina chang hre lo.
- Hnar aţangin thi chhuak
- Psychosis (thil ni lo ni angah ngaih tlat, hlauhna a khat, midang hriat theih loh hre tlat, mi dang hmuh theih loh hmuh tlat etc.
- Țhiantle leh chhungte bula awm peih lo
- Thil ruk ching.

Taksa a tihchhiat dante :

Amphetamine hian thluak chauh hi a khawih chhe lo a, mihring taksa pawh hi nasa takin a tichhe baw a, he damdawi hian thisen zamte a tichhe Țhin a ni. Mi hrisel pangngaiah chuan kan taksa hliam/pem leh dam lote a awmin thisen zam a kal Țhat chuan a insiam Țha zung zung Țhin a. Chu chuan taksa a tih hrisel bakah tisa/vun mawi/nalh tak arawn siam Țhin a. Amaherawhchu, amphetamine hman Țhinte zingah chuan thisen zam/thisen kal a tihchhiat avangin taksa bung hrang hrangte hmel hemin a siam Țhat leh theih tawh loh


Țhin a ni. Hengte bakah hian lungphu a tirangin, BP a ti sang a, khawsik sang tak a awm tir Țhin a, thawk a tibuai Țhin. Lung khawih avang hian tam tak chu lungphu chaw avangin an thi Țhin a ni.

Taksa peng hrang hrang a khawih chhiat dan te :

1. **Vun :** Arngeng a siam nasa. Tin, he damdawi hian thluak a khawih chhiat avangin he damdawi ti Țhinte chuan an vun hnuaia rannung vak tlat ten an hre Țhin a, chumi lak chhuah tum chuan an hmai an sik vak vak Țhin a, hliam/pân khawpin an hmai an khawih chhe Țhin a ni. Chu chuan hmai a tiserin a tichik Țhin a ni.

2. **Hmelhman a khawih chhiat dan :** Amphetamine damdawi hian chaw ei chakna te a tibo nasa thei em em a, he damdawi hman Țhinte chu hun rei tak chaw ei lovin an awm fo Țhin a. Chutianga chaw ei lo na na na chu taksain a tuar nasa hle a,





cher namen lova an cher bakah an kum ang aia nasa takin an lang tar thin.


2. Ha leh hahni 'Meth Mouth' : Amphetamine damdawi chak lutuk hian ha tuamtu (enamel) hi a tiral thin a. Chu bakah hahnia thisen zamte a tihchhiat avangin hahni a tisawng a; tin, chil a titlem a, chu chuan ka a ti ro a, hei hian ha a tichhe zual tulh tulh bawk a. Chu mai bakah he damdawi hmang ho te chu nasa takin ha an thial avangin a chhe tulh tulh thin a ni.

2. Sex a ti hluar : A m - phetamine hian tisa chakna nasa takin a tisang thin a, hei hian uchuak taka sex hmanna

a thlen theiin a thlen fo thin. Tin, chhia leh tha hriatna leh insum theihna he damdawi hian nasa taka a tihchhiat bawk si avangin, condom ngaihthahna te, a remchang chang sex hmanpui mai duhna te a thlen thin a. Hei hian sex atanga natna inkaichhawn theih hrang hrang bakah HIV a tihluar thin. Heng bakah hian amphetamine hian mi thenkhatah chuan tisa chakna nasa taka a thlen rual khan serh a khawng thei lo thung thin a. MSM te bikah chuan chakna nasa tho si, khawng thei bawk si lo chu an tisa chakna hrik thlakna tur dang zawngin an mipat puite lakah mawng an dawh phah fo thin. Hei hian serh leh mawng bawrah hliam a siamin chu chuan HIV inkaichhawnna a tisang zual thin. Rei deuh he damdawi an hman sual chuan thenkhatah chuan chakna a ti bo vek thin a ni♦

— KRISTIAN THALAI —

■ *America ram rorelnaa mi langsar tak Thomas Jefferson-a khan a zawm ngei ngei tur thuvawwn ziakin hetiang hian a tar, "Thinrim lai chuan tawng chhuah hmam vawi sawm chhiar hmasak ngei ngei tur; thin a rim em em pheih chuan vawi za chhiar ngei ngei tur," tiin.*



KANTU

Ramthar Tlangveng Branch

April 6, 2013-a Ramthar Veng Kohhran atanga Ramthar Tlangveng Kohhran a indan hnu, April 14, 2013 (Pathianni) khan Ramthar Tlangveng Branch KṚP hi din a ni a. A din tirhah member 278 niin tun (2014) ah hian member 303 an ni a, mipa 179 leh hmeichhia 124 an ni.

Member-ten Thawhtan Zan Inkhawm an ngai pawimawhin an phur thei hle a. Member inkhawm zat chawhrual (average) chu 124.97 niin, chu chu 44.95 % a ni. Pathianni Sunday School banah Branch Fellowship Programme an nei thin a. Pathianni zan leh thawhtan zan inkhawm banah thawngtai rual hun an hman thin.

Kum 2013 leh 2014 chhung hian Group-ah inthen lovin, Sub-Committee pasarih - www.mizoramsynod.org

Programme, Evangelism, Literature & Documentation, Music & Property, Refreshment, Decoration leh Sports Sub-Committee te siam a ni a. Sub-Committee te hi hmalakna hrang hrangah Branch kut ke tangkai tak an ni a, an pualin hun bik (Nite etc) te pawh hman a ni.

An Kohhran Pathian Biak Inkhawmah Reception & Ushering, sound control leh thawhlawm khawn te chu thalai chan a ni a. Kohhran chanchinbu 'PALAI' chu KṚP ten an enkawl a, kumin 2014 hian Bial chanchinbu 'Bial Aw' chu an Branch hian an enkawl mek baw. Tunah hian Missionary 5 an chawm mek a. Kristian Thalai chanchinbu 95 copies an la a. Kohhran Committee-ten an ruahman sak angin thla thar thawhlejni hmasa berah Branch

Committee meeting neih thin a ni a, Ex-officio 3 chhiar telin Committee member 26 an ni.

Faith Promise hi an sum hmuhna lian ber a ni a, an sum hmuhna dangte chu-Inkhawm thawhlawm, Cubic lung thiar, Sangha zawrh, Motor Sil, Electric Bill khawn, Nimbu tui zawrh, Passport size Photo thlalâk, Neih thil thiam thil lilam, Leikhachhe khawn leh hralh te an ni. Kumin (2014) ah hian an Branch budget chu ₹ 5,50,000.00 a ni.

CKTP leh Bial KTP ten bawhzui tura a tihte Pathian hruainain tha takin an la ti hlawhtling thei zel a. An

Branch din hnuah Bial KTP (Ramthar Veng Pastor Bial) Conference leh Bial Advance Christmas te an Branch hian hlawhtling takin an thleng tawh a. Presbytery leh Bial huap thil tihah Branch Item hrang hrangte an tihlawhtling thei zel bawk a. Kohhran Committee-ten enkawl tura an beisei angin Kohhran Zaipawl pawh nung takin an la kal thei zel bawk.

Kohhran Committee, Kohhran Hmeichhia leh Kohhran Pavalai Pawl te nen inlungual takin Kohhran huang chungah rawng an bawl a. Tisa leh thlaraua hmasawn turin tan an la chho mêk reng a ni♦



■ *Sir Edmund Hillary leh amah hruaitu Nepalese, Tenzing Norgay te khan kum 1953 khan Mount Everest lawn chhuak hmasa ber ni turin tlang chhip an thleng a. An chhuk lamah Sir Edmund chu a che sual a, a rap pial a, a tleng ta puat mai a. Tenzing-a chuan engtin tin emaw a lo chhan thei ta hram a, thihna an pumpelh thei ta a ni.*

Tenzing-a chuan Sir Edmund a chhanhim avanga chawimawina leh lawmman eng mah a dawng duh lo va, "Tlang lawn mite chu kan inpui tawm thin a, ka tih tur pangngai ka tih avanga lawmman leh chawimawina ka dawonna chhan tur ka hre lo ve," tiin a tang tlat.

Keimahni



■ March 13-14, 2014 khan North Lungpher Branch Diamond Jubilee hmanpuuin Asst. Secretary Dr. Lalliansanga a kal. March 13 zanah Chibai bukna (greetings) a sawi a, March 14 chawhma inkhawmah thuchah a sawi bawk.

■ March 20, 2014 (Ningani) 4:00pm khan Synod Committee Room No 1, Synod Office-ah Central KṭP hruaitu kal chhuak ten kum 2014-2016 atana hruaitu tharte hnenah mawhphurhna an hlan a, General Conference thlirletna nei zuiin zanriah an kilho nghal bawk. Hruaitu tharte hian meeting vawi khatna an nei zui nghal a ni.

Thurel tlangpuite :

1. General Conference Rorel Inkhawm thurel General No. 2-na **“Kum 2014 chungin ram pum huapin inkhawm vawi 1 thawhlawm Synod Hospital Charity Fund pualin lak khawm ni se”** tih chu **June, 2014** thla chungin Bial kaltlangin KṭP Office-ah theh luh hman ni se tih a ni.

2. General Conference Thurel General No 5-na **‘Youth Recreation Centre (YRC) puala KṭP member tina Rs. 5/- kan intuk thin Rs 10/- a tihpun’** chu **October 2014** chungin Bial kaltlangin KṭP Office-ah theh luh ni se tih a ni bawk.

3. Kum 2014-2016 chhunga Kristian Ṭhalai Editorial Board member hetiang hian inruat a ni :-

Editor : Pu Lalmuanpuia

Jt. Editor : Pu C. Laldingliana

Upa K. Rorelkima

Pu V. Lalrinmawia

Pu Vanlalpeka

Manager : Tv. R. Lalramnghaka

4. Synod Choir Director (2014-2016) atan Pu R. Lalruatkima, Committee Member ruat a ni bawk.

5. AVDB nena thawh hona Blood Donation Calendar siam chungchang sawi ho a ni a, office lamin a ʔul angin ruahmanna lo siam se tih a ni a. Calendar-ah hian May 2014 aʔanga pek ʔan tura ruahman a ni a, Bial tin thisen pek hun tur hi Bialah thawh chhuah mek a ni. Calendar hi khawpui chhung Bialte tana ruahman a ni a, khawpui pawn lamte pawhin mahni remchan anga thsisen hi pek zel ni se a duhawm hle (p-32).

6. May 1-4, 2014 chhunga Laitumkrah Presbyterian Kohhrana Presbyterian Church of India, General Assembly neih turah CKTP aiawh tur palai 3 inruat a ni a, hetiangin :-

1. Pu Samuel Laldinglana, Asst. Leader
2. Tv. R. Lalramnghaka, Fin. Secretary
3. Tv. Joseph Lalsangzuala, Committee Member

■ March 22-24, 2014 chhunga Khawbung Branch KTP Diamond Jubilee hmanpuiin Pu Samuel Laldinglana, Asst. Leader leh Tv. R. Lalramnghaka, Fin. Secretary te an kal a, inrinni zanah Tv. Ramnghakan thuchah sawiin Pathianni chawhmaah Pu Dingtean a sawi. Hruaitu kalte hi zaithiam Ruth CVL Muanpuii, Dawrpui Vengthar in a ʔawiawm a ni.

■ March 28, 2014 (Zirtawp) zan khan Venghnuai Branch Committee leh Group hruaitute Leadership Training neihpuiin Upa Zonunmawia, General Secretary a kal a, training-ah hian mi 55 an tel thei a ni.

■ March 31, 2014 (Thawhtanni) khan Mizoram State AIDS Control Society (MSACS) buatsaihin I & PR Conference Hall-ah tunlai damdawi hlauhawm 'Amphetamine' chungchang zirhona neih a ni a. Hetah hian CKTP aiawhin Pu C. Laldinglana, Committee member chu a kal a ni.

■ **Tihdikna** : General Conference report-a Dt. 24-25.8.2013-a Suangpuilawn Kohhranah Synod Choir te Bial Meet hmanpuiin an kal tih kha Suangpuilawn North Kohhranah tih zawk tur a ni e.

KTP Blood Donation Calendar (May 2014 - March 2015)

Synod Hospital-a pe turte	Civil Hospital-a pe turte
1. May 2014 (Aizawl West & Aizawl Hmar Presbytery huam chhung) 1. Tanhril Bial : Branch - 6 2. Sihphir : Branch - 3 2. August 2014 (Aizawl Chhim Presbytery huam chhung) 1. Kulikawn Bial : Branch - 3 2. Lungleng I Bial : Branch - 3 3. September 2014 (Aizawl East Presbytery huam chhung) 1. Republic Veng Bial : Branch - 3 2. Venghnuai Bial : Branch - 4 4. October 2014 (Aizawl Bethel Presbytery huam chhung) 1. Chaltlang Bial : Branch - 3 2. Ramhlun North Bial : Branch - 3 3. Chanmari West Bial : Branch - 3 5. November 2014 (Aizawl West Presbytery huam chhung) 1. Vaivakawn Bial : Branch - 5 2. Zonuam Bial : Branch - 3 6. December 2014 (Aizawl Central Presbytery huam chhung) 1. Armed Veng Bial : Branch - 4 2. ChhingaVeng Bial : Branch - 4 7. January 2015 (Aizawl East & Aizawl Chhim Presbytery) 1. I.T.I.Veng Bial : Branch - 4 2. Tlangnuam Bial : Branch - 3 8. February 2015 (Aizawl Chhimthlang Presbytery huam chhung) 1. Bungkawn Bial : Branch - 3 2. Khatla Bial : Branch - 6 9. March 2015 (Aizawl Hmar Presbytery huam chhung) 1. Zemabawk Bial : Branch - 6 2. Thuampui Bial : Branch - 6 3. Airfield Vengthar Bial : Branch - 5	1. May 2014 (Aizawl West Presbytery huam chhung) 1. Dawrpui Vengthar Bial : Branch - 4 2. Tuikual Bial : Branch - 3 2. August 2014 (Aizawl Chhim Presbytery huam chhung) 1. MissionVeng Bial : Branch - 3 2. Hlimen Bial : Branch - 5 3. September 2014 (Aizawl East Presbytery huam chhung) 1. Venghlui Bial : Branch - 3 2. Bethlehem Bial : Branch - 4 4. October 2014 (Aizawl Bethel Presbytery huam chhung) 1. Ramhlun Bial : Branch - 3 2. Chanmari Bial : Branch - 3 3. RamhlunVengthar Bial : Branch - 3 5. November 2014 (Aizawl West Presbytery huam chhung) 1. Chawnpui Bial : Branch - 4 2. Luangmual Bial : Branch - 3 6. December 2014 (Aizawl Central Presbytery huam chhung) 1. Dawrpui Bial : Branch-3 2. Electric Veng Bial : Branch-3 7. January 2015 (Aizawl Hmar & Aizawl Central Presbytery hrang hrang) 1. Leitan Bial : Branch - 4 2. Ramthar Veng Bial : Branch - 3 8. February 2015 (Aizawl Chhimthlang Presbytery huam chhung) 1. MissionVengthlang Bial : Branch - 3 2. Maubawk Bial : Branch - 4 9. March 2015 (Aizawl Hmar Presbytery huam chhung) 1. Durtlang Bial : Branch - 3 2. Bawngkawn Bial : Branch - 6 3. Sihphir Vengthar : Branch - 3

Total = Bial 40, Branch 150

Note : 1. Bial leh Branch-in Ni bik denchhena pek kan tum hun nena a lo inrual emaw ruahmanna a tibuai deuha Calendar hi kan zui thei chiah lo a nih pawhin inthlahrung lem lo ila.

2. June leh July hiY.M.A. lamin an pek tam lai a nih thin avangin dah awl a ni e.

CENTRAL K.T.P HRUAITUTE, 2014 – 2016

Office Bearers

Leader	:	Rev. J. Lalremsiama	9862669230
Asst. Leader	:	Pu Samuel Laldingliana	9436198740
Gen. Secretary	:	Upa Zonunmawia	9436152024
Asst. Secretary	:	Dr. Lalliansanga	9612241873
Treasurer	:	Dr. Julie Remsangpuui	9436142235
Fin. Secretary	:	Tv. R. Lalramnghaka	9436351374

Committee Members


Pu R. Lalruatkima	9436360571	T.Upa Richard B. Lalthiatpuia	8974287347
Pu C. Laldingliana	9436140834	Upa K. Rorelkima	9436153444
Pu Lalthangvunga Sailo	9862381275	Pu V. Lalrinmawia	9862563362
T. Upa T. Lalawmpuia	9436366519	Pu Ngurhmingliana	9436374104
Tv. Joseph Lalsangzuala	9436152063	Pu Vanlalpeka	9436153728
Pu Lalchhuanliana	9862364583	Pu K. Lalruatpuia	9862577177
Pu P.C. Biakmuanpuia	9436374833	Pu Zonunsanga Ralte	9402113038
Pu Lalimuanpuia	9436142398		

Ex-Officio Members

Rev. K. Lalhmuchhuaka	—	Synod Moderator
Upa H. Zoliana	—	Synod Secretary (Sr.)
Rev. P.C. Pachhunga	—	Executive Secretary, i/c KTP



Kantu – Ramthar Tlangveng Branch



Postal Regn. no. MZR/81/2012-2014
RNI No. MIZMIZ/2009/29074



N. Lungpher Branch Diamond Jubilee hmanpuia kal
Dr. Liansanga leh branch hrwaitute



Khawbung Branch Diamond Jubilee hmanpuia kal
Pu Dingtea, Tv. Ramnghaka, NI. Ruth-i leh branch hrwaitute



Venghnuai Branch leadership training hmanpuia kal
Pu Mawia leh branch hrwaitute

Printed & Published by Zonunmawia, Synod Office, Mission Veng on behalf of Kristian Thalai Fellowship
Edited by R. Lalthmingthanga and printed at Synod Press, Mission Veng, Aizawl, Mizoram. Copies - 38,700